

Martxoaren 17an
GARIZUMAKO 2. IGANDEA

Gure Elizbarrutiko Misioak

Agurra

Bihotz-berritzera dei egiten digun Jesu Kristoren grazia eta maitasuna zuekin.

Sarrerako oharpena

Jaunaren aurpegi bila gabiltza: Jainkoarekin topo egitea beharrezkoa gertatzen zaigu Pazko ibilbide honetan. Aurten, Garizumako bigarren igande honekin, Antzaldatzearen igande honekin egokitu zaigu Elizbarrutiko Misioen jardunaldia: “Misioak aldatzen zaitu” goiburuararekin. Jainkoarekin bat egin eta senidearen bidean jartzea gure kristau izatearen ezaugarri dira. Gogoan izango dugu otoitzean eta diru-bilketan gure Elizaren alderdi misiolaria, ezinbestekoa duen alderdia.

Damu-otoitza

Senideok: Bekatuak aldendu egiten gaitu Jainkoagandik eta geure anai-arrebengandik. Egin ditzagun bakeak, damuturik bekatuen barkamena eskatuz:

- Jesus Jauna, gure erruak garbitzen dituzuna: erruki, Jauna.
- Jesus Jauna, guran bihotz garbia sortzen duzuna: Kristo, erruki.
- Jesus Jauna, salbamenaren poza berriro ematen diguzuna: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara.

Otoitza

**Jainko Aita guztiz santua,
zeure Seme maiteari entzuteko esaten diguzu;
emaiozu gure espirituari zeure hitzaren janaria,
gure sinesmen-begiak argiturik,
pozez ikus dezagun zure aintza.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Lehenengo irakurgaiak konfiantza izatera deitzen gaitu, Abraham deitu zuen bezala. Jainkoaren deia entzun eta uste on izan: berak aldatuko gaitu, bere Seme Kristoren neurrira aldatuko ere. Entzun dezagun arretaz Jainkoaren Hitz bizi-emailea.

Lehenengo irakurgaia (*Has [Gn] 15, 5-12. 17-18*)

Genesis liburutik

Egun haietan, Jaunak kanpora aterarazi zuen Abran, eta honela esan zion: «Begira zerura, eta konta itzazu izarrak, ahal baduzu». Eta gainera esan zion: «Horrenbeste izango dira zure ondorengoak». Abranek sinetsi zion Jaunari; eta Jaunak aintzat hartu zion zuzentasunerako. Eta esan zion: «Ni naiz Jauna, Kaldeako Ur herritik zu atera zaitudana, lurralde honen jabe egiteko».

Eta Abranek: «Jainko Jauna, nondik ezagutuko dut, jabe izango naizela?»

Jainkoak erantzun: «Ekariezazkidazu, hiru urteko behi bat, hiru urteko ahuntz bat, hiru urteko ahari bat, usapal bat eta usakume

bat». Ekarri zituen Abranek guzti hauek eta erdibitu egin zituen, eta erdi bakoitza bata-besteari buruz ipini; baina hegaztiak ez zituen erdibitu. Hegazti harrapakariak sarraskira zetozen, eta Abranek uxatu egiten zituen.

Eguzkia sartzean, Abran lo haundiak hartu zuen, eta ikara haundi bat erori zitzaion gainera.

Eguzkia sartu eta ilun-beltz egin zenean, labe bat agertu zen ketan eta zuzi bat sutan, zati haien artetik igarotzen. Egun hartan Jaunak elkargo egin zuen Abranekin, esanez: «Zure ondorengoei emango diet lurralde hau, Egiptoko ibaitik Eufrates ibai haundiraino».

Erantzun-salmoa (Sal 26, 1. 7-8ab. 8c-9. 13-14)

Jau - na dut ar - gi e - ta sal - ba - men.

Jauna dut argi eta salbamen,
nork ni beldurtu?
Jauna biziaren babes,
nork ni izutu? R/.

Jauna, nire deiadar-hotsa entzun ezazu,
erruki zakizkit eta adi nazazu.
Zuk esana bihotzean dut entzuten:
«Bila ezazue nire aurpegia.» R/.

Zure aurpegi bila nabilkizu, Jauna, ' ez niri ezkuta aurpegi hori,
zure zerbitzari hau haserrez ez bazter utzi.
Laguntza zaitut, ez nazazu la zapuztu,
Jainko, nire salbamen, eskutik utzi ez nazazu. R/.

Bigarren irakurgaia (Flp 3, 17—4, 1)

Laburragoa egin nahi bada, [] kako artean ematen diren zatiak utz daitezke.

San Paulo Apostoluak Filipotarrei

Senideok: [Izan zaitetze guztiok nire antzeko, eta begira niregan duzuen eredura dabiltzanei. Asko bait dira —askotan esan dizuet eta orain negarrez diotsuet— Kristoren gurutzearen etsai bezala dabiltzanak: haien azkena hondamendia da; haien Jainkoa, sabela; haien harrokeria, beren lotsarietan dago; lurreko gauzetan, haien egarria.]

Guk zeruan dugu geure herri; eta itxaron, handik itxaro dugu Salbatzailea, Jesu Kristo gure Jauna. Berak aldatuko du gure gorputz ezerez hau, bere gorputz aintzatsuaren antzeko eginez, gauza guztiak menperatzeko duen indarrez.

Horrela, bada, ene senide maite eta bihotzekoak, nire poza eta nire koroa; iraun ezazue horrela Jaunari leial, ene maiteok.

Ebanjelio-aurreko gorapena (Ik. Lk 9, 35)

Ain-tza Je- sus, Zu -ri be - ti. Zu za-ra gu - re ar - gi.

Hodei distiratsutik Aitaren ahotsa entzun zen:

«Hau da nire Semea, nire Aukeratua.

Entzun iezaiozue». R/.

Ebanjelioa (Lk 9, 28b-36)

Homiliarako argibideak

Haren aintza ikusi zuten

Sakrifizio ikaragarriak egin ditzaten eskatzen zaie gazteei gaur egun, euren ikasketak aurrera ateratzeko eta azkenean etorkizuna bermatuko dien titulu bat eskuratzeko. Askotan, etsitzeko tentazioa edukitzen dute, uste baitute ez duela merezi proposatuta lortzeko gorriak ikusi beharra. Egin beharreko ahalegin guztiak egin eta gero aurrera jarraitzen badute, etorkizun oparoa edukitzeko itxaropena dutelako da. Lortzeko esperantza dute, euren aurretik joandakoen egoera ikusita. Egia da ez dagoela inolako bermerik. Jesusen jarraitzaileak ere Jesusen ondoan zihoazen Jerusalemara, eta Jesusek esaten zien beraiena ez zela bidaia turistikoa, arriskuan jartzen ari zela bere bizia bidaia hartan. Hala iritsiko zen piztuerara, ordea.

Apostoluak Pazkora daraman bidean, heriotza eta piztuera bidean, adoregabatu ez zitezen, piztuera izango zenaren zantzuren bat eman nahi izan zien Jesusek eta, horregatik, haien aurrean antzaldatu zen (Lk 9,28-36). Une batzuetan, Jesus benetakoa agertu zen apostoluen aurrean, egunerokoan erakusten ez duen izaki loriatsua. Apostoluena bezalakoa zen Jesusen eguneroko bizimodua. Egun hartan, baina, Jainkoaren aintza, Harengan bizi zena, apostoluen aurrean ager zedin utzi zuen. Pedrok ongi baino hobeto ulertu zuen bizi zuten errealitatea, hitz hauekin: zein ederki gauden hemen! Bere giza nahia, Jainkoa ikustea, Jainkoarekin bat egitea, betetzen ari zela nabaritu zuen noski. Eurak, apostoluak, ere biltzen zituen Jesusen misterioak.

Misioak aldatu egiten zaitu

Elizbarrutiko Misioen Eguna dugu gaur, "Misioak aldatu egiten zaitu" goiburuarekin. Munduaren eta gizakiaren benetako eraldatzea ezin da izan manipulazio teknologiko hutsa, gizakiak dena aldatzeko boterea duela erakusten duena. Horrek objektu manipulagarria bihur dezake gizakia. Pertsonaren benetako

eraldatzeak espirituala izan behar du (Flp 3,17-4,1). Lehen planoan pertsonaren alderdi espirituala agertzean datza, eta ez, horrenbeste, horren botere, edukitze edo ongi pasatzea. Gizakiak gizakia gainditzen du. Zeruko herritarrak gara, ez lurrekoak bakarrik, aldi baterako baino ez gaude lurrean. Horrek ez du esan nahi mundu honetako gauzez arduratu behar ez dugunik. Aitzitik, mundu hau eraldatuta, Jainkoaren Erreinua gizakiongana etor dadin eta benetako herritartasuna ezar dadin egiten dugu. Egin dezagun otoitz mundu hobea egiten saiatzen diren gure misiolarien alde, eta lagun dezagun gure limosna oparoarekin.

Fedeak garamatza Erregetzara. Abrahamekin hasi zen abentura guztia, bete-betean sinetsi baitzuen Jainkoak agindutakoa (Has 15, 5-12. 17-18). Bere fedeagatik, ez zitzaion inporta izan bere herria eta familia uztea eta itxuraz deserrotu baten antzera bizitzea, behin betiko lurraren bila. Jainkoa handikiro konprometitua zen berarekin, aliantzaren bidez, eta nahikoa zuen horrekin. Une horretatik aurrera, Jainkoaren patuarekin lotuta dago Abrahamen patua munduan, eta Jainkoak munduan duen patua Abrahamekin eta horren ondorengoekin.

Kristo bera da ondorengoa, agindutakoaren oinordekoa, baina Harekin batera herri horren historian funtsezkoak diren bi pertsona agertuko dira: Moises eta Elias. Pertsona biziaren herrialdea dela erakusten dute, ez hildako pertsona multzo bat. Bizirik daude biak eta konfiantza osoz hitz egiten dute Jesusekin, horren patuari buruz. Haiekin lorian sartzeko Jerusalemenera heriotza ekarriko dion patuaz.

Eukaristiak Jaunarekiko gertutasuna bizitzera eraman gaitzala, eta eman diezagula indarra Garizumako gure konpromisoekin aurrera egiteko.

Jainkoaren herriaren otoitza

Egigun otoitz senideok gure egintzen epaile den Aita errukitsuari eta gure bihotzen ezkutukoena ezagutzen dituen Jainkoari eta damu-espirituz eska diezaiogun entzun dezala bere herriaren otoitza:

Erantzuna: Kyrie, eleison!



Ky-ri-e, Ky-ri-e, e - lei-son! Ky-ri-e, Ky -ri-e, e - lei - son!

—Jainkoak eman diezaien bere senideei Garizumako egun hauek egiazko penitentzi jarreraz bizitzea eta barkamenaren sakramentua oparo ospatzeko prestatzea. Egigun otoitz. R/.

—Onbidetik urundu eta bekatuagatik hil direnek Jainkoaren Semearen ahotsa Garizumaldi honetan entzunik bizi daitezen. Egigun otoitz. R/.

—Ondasunak dituztenei, Jainkoak eskuzabaltasun jarrera eman diezaien eta lurreko ondasunak denon onerako ugari ditzan. Egigun otoitz. R/.

—Garizumako penitentzialdiak ondasunekiko gure gehiegizko jarrera zuzen dezan eta gure espirtua sendotuz betirako diren ondasunetara begira jar gaitzan. Egigun otoitz. R/.

Jainko on eta leiala, bihotz zintzoz bilatzen zaituztenei Zure errukia agertzen diezu; entzun gure otoitzak eta suspertu gurutzearen misterioarekiko gure fedea, Zure nahia geure eginez Zure Semearen hitza entzun dezagun. Errege bizi baita gizaldi eta gizaldietan.

Prefazioa

Garizumako II. igandeak bere prefazioa du, Meza liburuko 132. orrialdean.

Bukaerako oharpena

Senideok: Garizumako bigarren aste honetan gure barruan behin eta berriz erabiliko ditugun hitzak berriz aipa ditzagun: “Hona hemen nire Seme maitea, nire zerbitzaria; zorionekoak zuek entzuten badiozue eta bidea harekin egiten baduzue”.

Jaunartze-ondorengo otoitza

Eukaristia honetan zure Semearen gorputza hartu dugunok eskerrak ematen dizkizugu, Jauna, lur honetan gaudela zeruko ondasunen jabe egin gaituzulako. Jesu Kristo gure Jaunaren bitartez.

Herriaren gaineko otoitza eta bedeinkapena

Jauna zuekin. R/. Eta zure espirituarekin.

Makur zaitetze, Jaunaren bedeinkapena hartzeko.

(Eskuak herriaren gain zabalik bedeinkapena esango du:)

Bedeinkatu, Jauna, etengabe zeure fededunak betiereko bedeinkapenez, eta egizu, zure Seme bakarraren Ebanjelioari atxikirik bizi daitezela, hark Apostoluei erakutsi zien aintza gogo biziz bilatu eta zoriontsu eskura dezaten. Jesu Kristo gure Jaunaren bitartez. R/. Amen.

Bedeinka zaitzatela Jainko ahalguztidunak: Aitak, eta Semeak, + eta Espiritu Santuak. R/. Amen.

Zoazte Jaunaren bakean. R/. Eskerrak Jainkoari.

Herriaren gaineko otoitzaren orde, erabil daiteke Bedeinkapen Nagusia (liburuxka honetan, 6. orrialdean).